

T 5427/4193

9

秋水閣墨副

壬

CHINESE - JAPANESE LIBRARY OF  
HARVARD - YENCHING INSTITUTE  
AT HARVARD UNIVERSITY  
JAN 10 1941

秋水閣墨副文類卷之八

巖居書齋類

與王逸季

不佞聞吳江之涓有二龍焉下上天門窟

古郵董光宏君謨著

秋水閣墨副文類卷之八

哈佛大學漢和  
圖書館珍藏印

古鄆董光宏君謨著

巖居書牘類

與王逸季

不佞聞婁江之淵有二龍焉下上天門熠燿  
變化更佐以諸龍子薄日月而挈天地具區  
為掀迺諸龍子中足下鱗甲尤奇也吳之靈  
氣方十七字內而又割其強半以畀烏衣之

胤造物者無乃汰而私耶不佞家東海濱時  
亦勅水鞭潮為戲然老矣帝猶靳其雲雨時  
令處壺中又處人指甲間不免禿尾每望諸  
足下挾豐隆駢列缺而渡三山頭角為聳也  
頃玄白則又盛言足下肝腸氣誼追配古先  
令不佞益神爽飛越梅梅望之玄白于僕石  
水交也願因玄白以交逸季刑馬沉璧捧盤  
血為盟然足下之國大不佞方風鬣憔悴而

牧雨工敢備鞭箠之役儻以足下神靈不終  
魚服他日珠宮銀闕間揚鬣而朝海上之儵  
忽足下與玄白首之不佞尾之喻哈元氣猶  
能一沛埏垓也君家弇州先生雖未及辱于  
門屏然心北面之日舊矣今徒飯乎玄白行  
敬先于下執事者并贊以不腆之詞延竚雅  
音一新里耳

與李伯遠

足下馬首北也僕方垂翅而東季秋之杪復  
謀出門謂尚得握手論心脩河梁之別既僕  
被抵就李間而星輶北指者十日矣有懷莫  
展愴如之何足下鴻文命代高情入雲常憶  
與足下抵掌夜飲壘磊四射每令人毛髮間  
勃勃生氣想見牀頭捉刀英雄至其悟決町  
畦篤茂超曠金石之誼即先民亡以隄之易  
水之上收駿者在焉足下手中銀不律足稱

千里定當奔電絕影令蒲梢掩色無勞以鍤  
如意鎚碎黃金臺也

又

不佞自入虎林輒日遲足下期一大蹂湖山  
乃從者竟闕不來豈北征在旦暮耶不得握  
手為河梁悵悵悵悵弟今歲間關萬苦中乃  
得一試如河朔老兵久在行間手足駁瘃筋  
力疲憊視小并州鍤即如解良大刀無復向

時左挈人頭右挾生虜之技足下徒見其壯  
未見其老也足下入龍已成高騫伊邇乘時  
奮鉅光我同袍幸甚玄白試卷復大佳足長  
三禮西北之事伯為政東南之事季為政獨  
如董生何脂車尚未耶僕猶作數日留倘欲  
一別西湖僕猶能執螺爵為伯倫酒臣也

與蔡虛臺

十年之間兩奉顏色足下鳳起龍變遂為天

上故人乃不佞蘧篔一博士巾非俛非仰戀  
戀而不忍去如蝦蟆陵老婦齒髮種種疆施  
芳澤而遊纓履之間咲不成妍語不成趣顧  
影且猶自憎他人得無唾去乎天飛淵伏會  
有主者乃其材亦固然求諸力則不勝命求  
諸命則不勝力柰何柰何辱在介弟行門下  
念此定當忤忤心動兄丈挺絕世之姿表驚  
俗之彩乘時直上此真天之私人白雲閑曹

計益當遠劈鴻濛旁蒐密藏茂齡碩抱漸羽  
九達拱手而議鼎鉉之業丈夫得意何必承  
明金馬間師復沅鴻奮鉅旦暮九列三事燕  
翼象賢後先翬映人間世所稱吉祥善事師  
與兄丈寔身擅之不佞辱在門屏依日月之  
末光叨誼既深受恩最渥菰蘆中時時觀聽  
首為天下歌舞即雲泥不相及然竊洒然快  
心如自得之矣

與郁孟野

頃歲就李再奉顏色數晷中卒卒別去不得  
一披肝膽英雄之情即不在咕囁顧得亡太  
洒落耶不佞椎且僊昨之後復鍛羽歸此于  
僕固當乃足下鴻文異藻雲龍駸駸天何忌  
足下甚也介夫孺子皆能知孟野才二十年  
跣足鎖闥卒不得見幸一朱衣者令冥冥中  
真有司命僕直欲建大槌捶之或者足下雕

續太甚抉摘無餘使真宰為讐耶則椎且僊  
如僕者造物又何以不憐而收我也有命無  
命無命有命此真不可解但願兒孫愚且魯  
無災無難到公卿僕日夜叩首如來誦南無  
後即繼以兩言足下聞此得亡大笑斷腸乎  
與范君材

不佞之鷓首西也日在塵坩中即不能以一  
須臾過足下為河梁語而足下寵之以尊俎  
又重之以華袞之貺故人洵多情哉願足下  
與諸君獨取高義而不佞惻惻者謂何離心  
可化俠骨難銷言念金蘭白日在莅蓋甚惟  
寐忘足下也社中四三兄弟徵逐如故耶人  
稱詞霸逋握酒權縱白馬於驚譚膏驪龍於  
飛唾無寧使電甲長神思而下走乎此時意  
中不審有董生在否

與王仲召



不佞之辱足下友籍蓋兩年所足下玄標素  
心殊情絕采僕甚惟寐忘之然而落落穆穆  
壹似非針水然者則古玄邈之交哉至於今  
而後知足下之深於僕亦猶僕之深於足下  
也讀扇頭贈言語語情至出入懷袖比於鮫  
人之珠念僕何以得此比社事舉乎諸兄弟  
徵逐如故耶鄉嘗與足下有緒言仲召勉之  
矣城堅不瑕噐堅不壘今日之事子為政無

使天下有以窺吾黨者幸甚

與黃又玄

不奉要渺之緒言歛已改令時念兄丈脩意  
曠心住世出世無所不可不佞即七尺無羈  
猶苦世諦櫻縛逡巡媿之讀觀乙扇頭詩寄  
志托物語語深遠黃君多情哉然雜之古人  
中幾不可辨矣虞曹多暇定當不廢觴咏塞  
芳擷采可得衣被故人乎弟眊眊老矣猶屈

首作五色蠹魚日夜以書飲食書復不飽鬼  
薪城旦俱令及瓜僕為天之戮民三十年而  
不得代豈有十世臯耶籛篠一博士巾非俛  
非仰念棄之不可服之無致出處之策尚無  
所定兄丈何以決之

答謝洪伯

玄白來得足下尺一若不以僕無似而欲收  
之者僕何以得此于足下哉玄白故有昌羊

之癖足下不察而復過聽之然僕老矣精已  
銷亡矣足下方英勇絕人二三徐君者復為  
之左掎而右角以盱六合寧有前壘乎倘盟  
坵間不紕邾莒請蹶跚蹙蹙脩贄玉而前足  
下無令地窟間鍾鼓驚我也

答沈徵梅

自頃歲一奉顏色其後聲息闐然迺胷中着  
一沈郎未嘗去也足下力敵虜虎文射雌霓

驚艷絕彩直欲憑陵千秋而猶俛拾不佞主  
臣足下知僕壯盛之時不知今老矣無能為  
也僕嘗以巧拙之爭不若力命非直不勝也  
命所擲掄又以為力詬病故近實塚書橐筆  
自比于几蘧之民而足下長及大棘猶橫而  
先之使僕猱然技癢吾忘吾戒乎然而有足  
下之力者可無命矣黃鵠九州神駿八極西  
吳之士而有先足下驟者僕則不信恨壁止

兩也大湖之湄吳山之麓試後以為期請科  
跣箕踞不妨與足下以一斛酒為三日之歡  
倘溟滓再甦尚當從足下一賈餘勇耳一笑  
一笑

與張子玄

長卿宿世故是蒲團上人根器既深近復冥  
蒐猛進遂了玄宗不佞時與周旋窺其澹情  
密行允是聲聞閨位人非僅僅舌上蓮花也

佛性在人如火在木金在土鑛研淘汰工力  
難少我能作佛佛不能為我作佛天下幾許  
英雄才氣籠蓋一世乃內不能調其寸心火  
宅華囊日迷日轉固是根器淺薄亦因天刑  
難解物或妒之明公竒抱偉才命令當世縱  
橫不律使望者却走出宰百里砉然奏刀乃  
頃者仰窺眉宇接玄論收氣滅焰冲然葆然  
壹似厭薄塵情而欲吐棄者君侯之於此道

深乎善哉乎君侯之言也曰未有不能經世  
而能出世者然僕亦謂未有不能出世而能  
經世者大都了則俱了一徹永徹我不出世  
世且入我何以經世我不經世世且焚我何  
以出世大英雄擔當宇宙調其氣精其心弱  
其志強其神即圭組旌干總為曇貝巖廊郡  
邑共是西方造化生心仙佛在手此自門下  
饒知之而饒辨之又何以稱未能空所有也

四大假合如石火電光又况乎官者寄中之  
寄假中之假辟若優孟登場倏而喜詫倏而  
悲啼倏而須眉倏而巾髮少焉還面洗妝相  
與目視而笑又奚以感吾真乎自古脩行人  
必備嘗魔境所以堅忍道念使弗退轉獍鬼  
奇魑伎倆有盡我之不聞不見無窮片念既  
澄萬緣俱遣我無如命何命亦無如我何又  
况此鸛雀蚊虻速起速滅固不足破大菩薩

一笑也不佞沉淪苦海為日已多心知彼岸  
有在却苦回頭不早君侯殊標異品乃一日  
而天假之緣請以八功德水為河洒楊枝水  
而盟之可乎對佛說佛不復自知其妄明公  
無徒大笑絕纓也

寄鄧定宇先生論文

蓋聞古所稱鉅公鴻彥為當代羽儀者必其  
標殊絕之采負頎碩之望文章德業雙至兩

雄然後可以冠冕縉紳師表士類而稱百谷  
之王不然者菽林以為主盟儒家以為格虜  
務華而絕其根非太上之致也又不然者游  
神泗水之里絕意中山之斑茹寔而吐其英  
非完士之槩也故自剖判以迄於今其兩者  
偏得之矣或不能至或至之矣而卒以偏其  
兩者全得之矣或不能至或至之而卒未全  
全之者竟千古僅僅幾人哉麟之角鳳之羽

雲有慶而星有景碩人瓌士彼其生常恨不  
得同字內即同字內矣而千里曠絕山靈妒  
其往來波臣擾其出入或者虎豹當關無從  
以其貧賤之身自効於典謁含意懷丹徒以  
精神相向往則疑有鬼物者媒孽而阻持之  
微獨所遭之不穀也不肖宏始生十餘年則  
已知江右有先生者已稍長而知天下有先  
生已又益長而知先生非直今天下所得私

而有也先生鴻篇鉅製所為藏名山副金匱者無從窺其百一而至于制舉緒業猶足以命令當世而賈其餘明公之立朝也寥一與居朝徹為友負四海之望而無意于求庸任天下之重而必期于達可二十年仕路強半山林向者一二權采之勢可以燔灼天下明公獨以恬心曠節屹立于中虺虎當其前而不動蛇虺蜥蜴伺其側而不能拾所短長以

為之蓄海內自學士大夫傳之以至田老牧豎無不願一見而披睹者煌煌乎明公之文章德望亦已盛矣其于三立之林而兩焉亦足以自愉快矣不肖東海一豎儒尠所曙識而獨于文章制作之場蓋幾於飲食而寤寐之者昨晤童君謂先生數日間入虎林也夫以二十年所夢寐饑渴以為麟鳳景慶而不可得者一旦而天假之緣蹤跡近在數十里

天其以幸不肖而玉於成耶昔太冲借聲于  
玄宴仲宣折節于中郎昌黎委質于敬輿眉  
山改服于永叔彼皆以絕代之才臭味雅同  
聲氣相偶宏亦何人濫此竒邁者乎乃不肖  
輒有所政於明公者玄黃既闢人文以宣日  
星淵嶽之靈輶為五精飛為五采氣有厚薄  
而才亦如之剖判以來殊支異委逋為主盟  
故文言秦漢書推江左詩祖李唐詞稱趙宋

詞之餘名勝國至昭代而氣所全涌極矣門  
戶聿繁伎倆既盡則昭代不得不博取而兼  
攻之博取而兼攻之而鑪錘摹範卒無以駕  
古人也則不得不就其似以自文大要今之  
脩詞者二有祖咸陽禰西京句櫛字比而侈  
以為商周之鼎者則于鱗子威諸君子是也  
有發舒吐露內足於意外足于象不必為秦  
漢唐宋而未嘗不秦漢唐宋者則元美應德



諸君子是也兩家強項而不相下若晉楚然  
然吾以為與其為于鱗子威也無寧為元美  
應德乎盖才有所難兼體有所不可具能穿  
楊者未必能扛鼎能視垣者未必能射覆能  
搏虎者未必能呼猿能解禽者未必能調馬  
技所限也前權後勁而施之俎豆則拂井幹  
章華之麗而丘壑則駭體所殊也秦漢唐宋  
雖殊總之獨造首創神理所極各有至焉秦

不必襲周漢不必襲秦唐不必襲漢宋不必  
襲唐而明之人必欲雲仍而祖之得無令諸  
君子笑地下哉優孟之貌楚相胡寬之營新  
豐似則似矣而非其真也有噐於此割首山  
之銅鑄以巧冶綴以幻藥螭文樛枝宛然三  
代遺製也博古者過而胡盧之價曾不盈刀  
故宏以今之修詞者必勇稅凡路獨標殊品  
庀材于昔而鎔意于今奪胎于前而範格於

我牢籠衆有駟捷群靈無隻語不出于古而亦無隻語出于古以此勒成一家藏名山副金匱庶幾可乎庶幾可乎昔魏有五石之匱喟然大也剖之濩落無所容宏之言侈大而無當其以為五石之匱矣古之贄而見者或以羔或以雉或以璧玉或以脩脯貴其虔也不肖方為人塾祭酒將進而受教于門墻無能以羔雉之禮見輒媿媿進其卮詞主臣先

生豈以是為野人之芹耶門下文總統當世宗工百代往千秋來所可否天下以為雌雄尺管窺穹蒼之大寸莛發洪鐘之響惟先生弗譴其罔進而教之幸甚

### 與吳無競

鄉足下之辱吾海上也不佞方旅食吳興昨秋鎡羽歸居且半歲則足下闐然不來頃仲君傳足下將以是月省覲弟日夜引領而西

睇幾不得下無柰為塾祭酒見迫遂重繭走  
萬山中無從一奉笑語天之巧左吾兩人何  
故玄邈之交千里衽席然使於越山川客以  
無競而獨斬一董生以稱地主其不欲煩大  
史奏耶貞甫玄白近相晤否肝腸誼槩二君  
實兼有之雅聞足下英雄氣骨秦鏡在手縱  
雙眸于兩吳之間如二君者恐未易三也近  
制作定當侈富羅刹錢塘其勅長年固緘篋

而渡恐蛟龍窺見夜光郵入有便能弗斬以  
一斑示我乎望之望之諸君社草成耶頃辱  
足下採及不佞僕則安能其以為羔袖則無  
乃為諸君羞謹上數首金昌之權計以何日  
返雙魚有便幸損德音無令數百里外跋巡  
化為石也

與吳叔英

不奉顏色者浹兩旬所矣不佞每歲食貧恒

時作客昨者裹足重趼入萬山中形響既殊  
陵谷亦改四顧躊躇幾有錦官長喟已而抗  
顏南面朋儕輩來既多問棘之車亦饒載麴  
之騎天孫落于綺席花神妒其艷詞兩月以  
來雅多臭味居甚安之所恨楊柳縈思芍藥  
在佩攝千慮於三嘆亦一腸而九迴每念足  
下醲情澹韻誼若在原白日蒞盟能忘五內  
之缺惟是不佞閔然離群而足下與社中四

三兄弟促膝連裾披華振彩筆鋒矯而直射  
雌蜺墨瀋橫而忽吐靈鷲長君之來文壇更  
有飛將乎此之為快亦何減鄴下翩翩時也  
妒之妒之

秋水閣墨副文類卷之八下

古郵董光宏君謨著

巖居書牘類

奉答楊以忠先生

先生之遠吾土也十易霜霰矣其細萌之思  
若慈父母章甫逢掖之思若日月焉又若岱  
華與溟澥焉而不肖所懷實兼兩者自頽頂  
踵七尺間以之銘高厚恩不可盡竊尸祝俎

豆比於畏壘之民夙興夜寐斲少豎咫尺以  
無忝先生門墻而天之刑不肖宏也三射策  
三不見收情與年去貧與賤并即罔極在念  
勿諼在衷時欲借一芥蹠奉啓屈狀以布腹  
心之欸欸而覲首慙心濡筆復罷徒日夜引  
領北望瞻斗衡而祝曰先生之業庶其與日  
月升恒乎乃紹者遠來辱賜鼎翰重之以筐  
篚長跪發械慰存之餘繼以訓督深情碩誼

恍若挈之函丈而提命者三復涕洟不肖之  
身何以得此豈師台暱之而忘其醜抑所謂  
愛其人則憂其無成者耶昔侯監委心於虛  
左馮生畢忠于遷舍恩之所啣義烈皎日精  
之所結氣貫白虹俛仰古今壯士同執宏豈  
有匄無心敢忘斯志乎伏惟老師乘時奮鉅  
獨領西陲鞭笞萬里鴻暮長筭計當使五單  
于解辨屠耆請朝不日者且開府建鉞為國

家熊羆不二心之臣懋伐殊庸銘旂鍤鼎宏  
雖逝在東偏請從數千里外撰鏡歌出塞諸  
曲以鼓吹休明闡揚大烈可乎不肖材猶廢  
櫟命實勞薪兼以神理習荒竟身之事杳不  
可曙或者馮藉寵靈要天之幸則請叫九閭  
排閭闔昭昭揭日月而行假令白首太玄則  
吾師之繩履具在誓當修身砥節不媿衾影  
竣竣齒讓令州部名為善人此則所以報吾

師萬分一者也所非衷言有如白水

奉馮用韞宮詹先生

宏不佞蓋幼而從父兄讀書論天下士嘗妄  
以文章材器必無兼能脩詞之家秦為桴漢  
為鼓椎自標張其舉趾高矣而以適用則舛  
或者踈節罝材世罟之不免令天下口其姓  
名以為文士詬若夫嶽嶽淵淵者方之人師  
保而事神明而稱不翅尊重矣而授以中山

之斑漆然無色彼自以金石鴻寶安用此竹  
素乎哉則古所稱三不朽立者胡不以兩也  
伏惟先生體振古之姿抱太上之器學師萬  
乘文控百流蓋自丁亥之秋不肖宏從公亮  
表兄所得門下文而讀之已戊子而讀楚牒  
已辛卯而又讀燕牒也薄霄霓之下窮塊垆  
之上來無倪往無轍茫乎化人之宮哉不肖  
為之饑以食寒以衣愁以平倦以起神氣四

馳狂呼以拜蓋自是得門下半也而既者公  
亮君房兩先生又為言門下之粹白鴻鉅愴  
恍乎如見古之人則又北面而祝曰天乎夫  
天其棄我也必不同公時也天其私我也必  
不左公遇也令此生而得奉頴洒執簋貳以  
一稱弟子列者于死可無恨矣斗瞻河朔甚  
惟寐忘之而不意不肖宏之姓名亦嘗辱門  
下之耳不肖宏之文亦嘗辱門下之暇不寧



是也而重之以獎飾之鼎不寧是也而愛其人以念其無成則不肖何以得此於門下哉門下之文章破鴻濛敵造化貞心而馭之以絕調卓識而斧之以殊采驅撻百家籠罩千古立朝之槩亦惟是正直忠厚平淡聰明竊嘗彷彿前氏則敬輿退之永叔子瞻庶幾其流 朝廷方樹盧夬覓願與天下更始門下左火龍右粉藻趾仁蹈義揖臯契而武夔龍

古今所必不得兼者亦既有兼能矣年未四十為

帝者師伊傅之舟鼎在望天下必不能傲之以不知而形之以所不有矣則豈非造物者挈玄黃瑋麗私而完之門下以為古今標與損三驅之網而不遺落羽聚九牧之金而不棄鉛刀顧影拊心不肖之獲幸於先生誠不自知其所以既已汗焉內慙又復矯矯思奮

也不肖雖籩簞渺末無能自比于當世而至  
其砥淬名行竭蹙人士之林必不敢以身為  
尾蚤夜濯磨不媿衾影則師台之典則具在  
假令白首太玄猶能繪情雕物鼓吹一時讀  
先王三物六行之書為鄉祭酒跋齒讓令  
州部稱曰善人或者憑藉寵靈要天之倖則  
請提肝挈膽昭昭揭日月而行計此時先生  
方以德業文章稱名宰相不肖獲從弟子之

後而一樞衣問道乎猶能一奮其股肱以奉  
鞭弭或亦先生之所許也

### 與王辰玉

不佞句甬之木疆人也妄嘗意驚千秋目營  
九有以今天下所號為才大都其貌才者也  
率強項不為下而近於吳越之間獨心折吾  
辰玉心折吾辰玉則以行素諸編故然而中  
心藏之不敢以語人也又不敢以辱姓名通

也為其似于炎吾辰玉也乃讀足下近草益  
多睹其神益王才益雋而竒則為之超距奮  
躍北望呼足下而嘯心怦怦不自己足下豈  
其吞九瀛海蹴崑崙登方嶠玄洲噉安期如  
瓜之棗者耶何距麗而玄曠也夫以足下才  
何屑越于一舉首而夫夫者猶呶呶口之將  
謂相國之子必僮僂襍襍必僅能鮮衣怒馬  
而飽五侯之鯖者耶即才有文矣必稿項黃

馘一無以自豎於世而後為相國體耶向從  
黃先生所得足下長歌諷之感憤用壯目瞋  
髮指既寃足下又為黃先生寃也然而天下  
未嘗不艷足下才欲粹言者而折其喙已矣  
足下無庸感憤矣天飛淵伏會當有時葳蕤  
一進賢冠寧遽貴重辰玉請以不朽之言與  
不朽之樹為辰玉期乎然寧獨制義而已讀  
足下制義固知足下執牛耳於三立者也不

佞生海堧所睹識三十不成名壯心未已  
唾壺欲缺每欲舉彌天之網頓八紘而掩之  
盡天下異才與明信端亮之士而與為針水  
請奉盤匱刑白馬就介弟之位與足下唾血  
而盟乎足下即鳳舉鴻漸倚閭闔而窺九煙  
乃中山之斑隱顯共之近者拱揖五位之前  
斧藻皇路下亦可託名山沉蒼水矣知己於  
萬世足下寧以今日所有與世俗所以炎足

下者驕我哉必不然矣

與盧君瑜

不望青芝之氣三已周星每念足下穎材茂  
姿曠懷高誼晝結于想夜夢于寐神爽飛越  
不知身之不在東西峴也雙鯉云渺八行遂  
踈故交之謂何吾慙吾面昨歲華札附孟修  
來時不佞在海昌遂不及會既從虎林會君  
家思遠乃知足下一旦裹糧走陽明宛委間

讀書萬山中撩青霞騫紫霧蹴破塵網汗漫  
九垓此自大英雄氣骨願出必數月數月以  
歸得無重細君諄耶一笑翰來復知明卿諸  
君理業湖中喜而可知也不佞始欲仍舊羶  
無柰為試事所羈試又不得意念跋履往來  
非計遂已謝其使者當事者之于文可謂兼  
收博採雜近巧拙而不佞獨以拙見遺此豈  
有鬼物妬我搃之博士巾非進賢惠文久戀

不去便煞風景今且閉關息影伸紙濡墨皆  
以怒氣鼓之勇且百倍擬以棘中為鉅鹿之  
戰不破函谷關不復稱江東弟子矣鄙意若  
此未審天道若何願與足下勉旃

與吳比部

昨歲燕市中獲奉顏色故知門下非行旅中  
人歸從玄白所得門下益詳已復得門下封  
事讀之而後悔其始之辱交籍未深也人間

世一持手板輒倒黑白內易肺腸外更面目  
即且甘帶噴最無已頭上進賢冠此豈千秋  
萬歲物耶慧者視之可一握為笑而彼且自  
智其愚不已而戰于蚊之睫不已而飽于蠅  
之吭吁嗟乎士羞言之矣門下殊翰竒服矯  
矯人群曩疏草一出令河漢動色日月增華  
計秦中之遊豈減長安馬上誰能以一世驕  
足下千萬世也風波之民日以蕩折扶持國

是彈壓奸萌是在公等公無忘此橫目者乎  
不肖管質蓬心無當于世妄嘗意驚千秋目  
營九有思得天下駿雄弘達之士而與為針  
水念門下既已其人顧猶未能不以世俗腸  
待門下頃從着師遊而知門下亦嘗辱一言  
之譽也則豈其臭味哉董當刑馬沉璧就介  
弟之位捧盤血而盟足下許我乎着師歸謹  
問啓處併布腹心然公煢然在疚不能走五

和之陽  
百里為素車白馬之客而僅以一芥蹶自通  
則不勝泚顏矣

與吳叔英

頃夏歸僅一再聆教音然浣煩滌渴足當陰  
山三丈雪矣不佞坐人一片青毡日踉蹌從  
事以家為傳舍如五色蠹魚寢食詩書中寘  
之他則枵然枯耳學書不成為箕未貨交誼  
多缺雅道載荒可為柰何所尤媿慙者長公

之車轍儼然在望而竟不得一握臂為驩長  
公當亦笑其亡賴也聞足下冬間亦當歸試  
信然耶果爾又不知徵逐何日情之所鍾政  
在我輩吾不能如田子方抗手為別也

與丘生

不佞之辱籍於足下有年矣識足下不可謂  
晚知足下不可謂不晚數年間蓋始矚其貌  
繼賞其音而迺今析其肝膽君為石我為水

微情遠韻倏然相遇於壙垠之宮愉快哉不  
謂歷下琅邪之交行可復覩讀足下贈語下  
撞碧海上撩青空何不律之雄雉也昨者舟  
渡羅刹馬首踰峴而西無柰精光橫發為六  
甲長神下窺幾欲怖絕則復白眼睨天念足  
下不自持耳東錢之遊果乎諸君相追逐如  
故耶短墻自踰人將入戶勉旃足下無使天  
下有以窺英雄也

秋水閣墨副文類卷之八

古郵董光宏君謨著

四六類

啓蔡肖無使君

令布玄冥萬壑收魚龍之沫序臨廣莫九天  
晶日月之光當彼變衰感此行役白虹氣杳  
虛傳鼎竈之丹紫電光沉空冷刀環之色伏  
念宏樸邀下品卷曲微材自媿人謀不用左



車之計亦無天幸坐失右賢之軍處貧賤其  
非時議功名於何地慷慨擊錢塘之楫不試  
長安馬蹄縱橫枕樵李之戈自負上林花約  
怙茲七尺幸有二天倘三師棄甲不足以廢  
孟明則一劍登壇猶可以快曹沫伏惟老師  
化成東土績懋南陲朱轂朝天閭闔應傳第  
一錦題映日旂彛定見無雙昔卓太傅以中  
牟冠勲庸黃次公田穎川拜丞相不謂曠典

今將見之獨不肖猥蒙膏澍重辱照臨繡裳  
北去神飛遵渚之期綵鳥西翔目極鳴陽之  
路前者伏蒙嚴命屬以行編深切氷兢受茲  
山負自慙里語無當角徵宮商自有鴻章為  
世山龍火蒸伏惟郢削曷任主臣

又

青陽謝令太和聚桃李之門赤帝乘符化日  
在薪樵之野斗北元來天極文昌拱揖尤先

周南舊是星分域樸瞻依更切恭惟臺下儒  
紳碩望朝野鉅宗千里專城左提風雷而右  
挈雨露五年造士朝訓禮樂而夕討詩書念  
宏彘彘末品落落榦材每自惟五色虫魚飲  
食名山之簡非敢謂九苞鸞鷟賡和上國之  
音乃其材陪下乘命屬勞薪巧不發生人之  
秘而誨妒有餘智不洩造化之藏而降威太  
甚家立長卿之四壁豈能賦就上林身懸季

子之一編未許行遊列國况生平鑄骯髒以  
為骨碩影自憎誰慙懃抽俠烈以為腸入門  
相慰獨惟臺下恩隆博覆義重師模寸骨九  
銘皎日照夷門之里片心百結清霜擊易水  
之流惟是新綸在簡山靈地鎮欲率土以攀  
轅仙馭難淹海若波臣共籲天而灑泣矧宏  
在門人之列寧詎無國士之情爰以小言恭  
攄別悃

又

一辭榮戟兩度居諸依日月以承翬儼雲霄  
而在望念宏林藪下走堧海賤臣駑馬力何  
足以馳驅漫思西極華虫飛不能以尋丈妄  
意南圖中邁天刑復遭家難寥寥宇宙誰收  
不譽之人擾擾乾坤自托無言之李既撫心  
而慷慨亦汗顏以躊躇恭惟師臺范終古之  
鑪而鑄九牧弗棄鈇刀頓彌天之網以掩八

紘不遺落羽揚諸衆多之口拔于困踣之中  
臨太行以歛歔豈有追風之驥撫夷門而太  
息慙無貫日之虹覆竝玄黃恩同怙恃平生  
肝膽啣齊國之大夫今日形骸許魏王之公  
子生乎不造命亦何言媿此黑貂伴十年之  
風雪空令白鳳吐萬斛之珠璣今者越在海  
邦戴瞻山斗赤城雲起遙聯紫帽之峰碧海  
波生恍挹清源之派敬裁尺楮奏記崇臺併

附小言伏祈教削

閩中啓饒督學

莆陽春曉花深問棘之堂化日雨多材物克  
楨之國文明有燦丕顯其光恭惟門下心登  
道岸文主代盟大雅登壇力洗西崑之習身  
模鑄范手還先輩之刑樹桃李以成蹊令國  
家食其實而得蔭斲輪困以薦御使王公棄  
其短而拾長將火齊木難賦盡南閩之貝即

蛟人蜃客橐垂窮海之珠吾道增輝士林胥  
慶不佞濫竽讞役幸際朗辰愚秉不移詎敢  
謂明刑弼教民期無枉亦惟是隨地得師夫  
禮之所去乃刑之所取聖世必糾二三之德  
以振繩上有式政則下無疵民士師且抱三  
千之牘而退聽諍耑鳧介虔勒魚蹠寧惟布  
悃款於崇臺寔望領誨提於副墨并將芹藻  
先代雉羔睇戟影高入五雲遙勤鄉往聆鐸

音近在旬月彌用溯瞻

又

祥鍾寶婺彩躔依南極以生輝夢叶長庚威  
羽軼河東而並瑞允矣熙朝盛事猗與聖世  
名門恭惟門下衡廬秀矗雲夢氣吞壁立千  
尋矻矻奠如山之噐墟歸萬壑汪汪濔若頃  
之波首常棣以先華競芝蘭而並爽瑜璧必  
名山而孕啓明先皦日以升天為碩人篤茲

淑母惟丙午六月之朔實春秋八十之辰半  
戶宮花軒冕盡人間之瑋麗滿牀紳笏聲名  
萃宇內之神竒懸知控鶴西池不待飛瓊為  
使遙想採真南岳無勞子晉吹笙閑撫蓀枝  
靜觀公輩共射四方弧矢聚士民愷懌以修  
膝下之歡昂分三地珪符標鍾呂功庸而効  
罔極之報愉乎樂矣休與羨哉不佞辱在通  
家素欽壺範裁雲剪漠知名公和五色而成

觴鸞鳳膏龍計群言有百家以為俎惟是風  
塵之吏僅茲悃款之處敬祝岡陵薄陳芹藻  
爰頓首而肅雙鯉復盥沐以頌九如

荅湯直指啓

素秋萬里駐使槎于支石之津浩魄一輪鑑  
人文于照膽之鏡猗與雍典值此淑辰遙知  
百炬星羅下筆春蠶食葉竚想千裾雲擁無  
譁戰士含枚繡衣色映文昌鼎鉉香分鎖棘

迺當夙夜在公之頃聿垂翰貽辱問之勤穆  
矣清風敬懷明德於襟袖燦茲白雪遙聽共  
和乎陽春敬勒短箋奉申謝悃臨風瞻切伏  
楮馳神

又

氣晶璇宇問蓬壺近在三山月散榕城隨仙  
使平臨萬戶望光華之有爛竊照燭之餘輝  
恭惟明公心波澄漠全閩映皜若冰壺德嶽

于霄庶采芘恢然廣廈茲者商飈薦爽見造化之時與盈虛衆寶告成知尊者之道存亭毒况以秋中素景臨茲校士棘闈月照牙旗桂影踈多士入廣寒之穀星羅寶炬傳呼急九達疑火樹之城不佞僻在樵川遥矚台旗聽金風四靜緊攬轡誰功望銀漢獨橫更巖瞻倍切敬脩芹獻奉佐桂筵青天高可問何日解若士之滂遊明月屢相過此際儼至人

之彷彿目與屋梁而並注心隨賓雁以俱翔  
又

恭諗商德已深陽明未代撫茲令節更切巖瞻明公當斯際也惠文整肅知無假傍倩以正冠彩筆縱橫應可待摩空而作賦方且手散九秋之爽心迴萬井之蘇而不佞磴道間關尚違瞻奉滂興嗟于短髮惟分噓乎長風固知退食委蛇不必餐落英之紛露遥想袞

衣有爛無勞，紉芳辨以為裳。敬佐登高薄陳，  
在澗媿此。爰爰之束，惟涓欸欸之衷。統異茹  
溷曷勝馳企。

荅延兵憲

雲擁霜臺時望飛，旌獨隼風傳。星騎忽來濯  
錦雙魚，何使君乎多情。期河朔之名飲，開緘  
色動佩誼，感深恭惟。門下文武殿邦貞，明握  
紀績冠天中。手控三陲，門戶才卑。鄴下足躡

七子建安上游之鈴柝，不驚功誰攬轡。東壁  
之圖書無恙，清可投壺。念宏學本阿蒙，命惟  
措大。卑爾技如鼯鼠，虛煩俊髦千群。徒然身  
作蠹魚，不吐汗青五色。明河咫尺，時聽涼颼。  
自北來紫氣繽紛，每望美人而西嘆。豈期台  
注惠此寵招，未霑湛露之華尊。先荷馨香于  
既醉，敢不道旁竭蹶。肅候前茅，銅雀秋深七  
十二塚之纍纍。足堪鼓掌金猊，夜永三萬千



水經注卷之八  
場之擾擾聊用破顏縱太行以豁眸瀟洒傍  
天門爽氣挹漳湖而洗耳霏微聽玉屑緒音  
敬勒短箋布謝昂命

又請延兵憲

法霜曉肅聲傳虎柝徧郊原德日冬溫色借  
龍光分斗犖心馳仰止地切儀刑敬將芹藻  
於澗谿異枉星辰之履舄恭惟門下清時柱  
石昭代喬恒畫建朱幡指頤動兩河雄律晨

飛彩筆縱橫射五色雌霓重地久資碩人允  
矣北門鎖鑰文經復兼武緯峩然中服羽儀  
宏猥以提衡幸承鞭御自碩識慙雷煥邠知  
豐獄神鉤終然相匪天機安辨沙丘上駟茲  
聊竣八庠之役真素此一月之餐仰嵩高秀  
矗千尋無能縮地望台柄昭回咫尺時用搖  
旌敬詹七日以消除就彼三臺之閑曠僭迎  
牙燾薄儼尊壘看匝樹飛鳥猶帶取當年日

影問遶臺逝水曾記否疇昔歌聲傾耳竦身  
聽鳴鶴九臯之野盪膏決皆送飛鴻萬里之  
雲固知使君了公事於湖中不減兩州勝賞  
庶令儻子偷餘閑於世外共追百代名踪謹  
清道以前驅願抗旌而早賁預陳悃款伏冀  
慈渥

求 誥命啓

如綸如綽 聖朝䟽逮本之殊恩為龍為光

國匠握榮施之鉅柄斗瞻素切霓望彌深恭  
惟門下秀轟武夷靈鍾溟渤姓字冠天香之  
龍管人指僊流班行綴日影之螭磚共稱儲  
相朝憑玉笈抽簪雲漢之傍暮拱銀河曳履  
星辰之側不肖材同蟬翼竽濫鳩曹茲當慶  
典之載頌幸遇覃恩之異數既已要榮于再  
命因之晉秩于所親伏念順德之林徒睠懷  
其為細罔極之報即鍾釜以猶輕所望當世

和入降皇三品  
卷之八  
鉅公錫之片詞異藻文成華袞俾入子要天  
言以事親字挾風霜使下士藉王章而報本  
此群倫延跂以望宇內廟祀而求者也宏跡  
雖滯于登龍情實深于佇鵠敬遣吏士上懇  
台端伏望俯抽中秘緒思木鳳下九霄之黼  
繡惠洒西清餘瀋金鑿散六傳之雲霞則賁  
泉臺光梓里父子銜懋德于無涯而捧元呂  
戴天球頂踵沐上仁于不朽矣

鉅公錫之片詞異藻文成華袞傳人于雲天  
言以事親字挾風霜使下士藉玉章而報本  
此群倫延歧以望宇內廟祀而求者也宏跡  
雖滯于登龍情實深于佇鵠教遠更士上懇  
台端伏望俯袖中秘緒思木鳳下九霄之麟  
繡惠洒西清餘瀣金鑿散六傳之雲霞則貴  
泉臺光梓里父子銜慈德于無涯而捧元呂  
戴天球頂踵沐上仁于不朽矣

